

Vivian Balakrishnan anggap kesepakatan dwipartisan bagi dasar luar S'pura satu 'rahmat'

BERITA Mediacorp, 29 January 2019

SINGAPURA: Dasar luar Singapura berdiri kukuh atas sokongan dwipartisan dan ketiadaan campur tangan parti-parti politik, adalah satu "keberkatan" yang perlu dikekalkan.

Demikian menurut Menteri Ehwat Luar Singapura Dr Vivian Balakrishnan semasa menjawab soalan yang diajukan di persidangan *Singapore Perspectives* anjuran Institut Pengajian Dasar (IPS) hari ini (28 Jan).

Di penghujung sesi dialog selama 90 minit itu, Pengarah IPS Janadas Devan membuat pemerhatian bahawa "politik diketepikan" apabila melibatkan kepentingan negara. Beliau kemudian bertanya kepada Dr Balakrishnan jika ini boleh dikekalkan pada tahun-tahun mendatang.

Dr Balakrishnan menarik perhatian bahawa "dasar luar bermula dari dalam negara", sambil menjelaskan: "Kerana kami berjaya dan bersatu, kami dalam kedudukan baik. Saya boleh memberitahu rakan-rakan saya bahawa Singapura tidak akan pernah ditakut-takutkan atau dibeli."

Ditanya bagaimana hal tersebut dapat dicapai sejauh ini, beliau berkata, bagi apa jua dasar luar yang penting, banyak waktu diluangkan bagi perbincangan dalam Kabinet dan pembangkang juga diberi taklimat tentang isu-isu tersebut.

"Saya berbesar hati untuk memberitahu anda bahawa berdasarkan pengalaman saya sejauh ini, tiada jurang yang wujud. Tiada jurang politik yang menghalang urusan dasar luar kami. Ia satu rahmat."

Dr Balakrishnan berkata, kesepakatan dwipartisan perlu dikekalkan kerana Singapura adalah sebuah negara kecil dan tidak mampu merumitkan keadaan seperti berlaku di negara-negara lain.

"Lebih baik berbincang secara privet daripada cuba menunjukkan perpecahan dalam Parlimen," katanya.

"Tentunya, pihak pembangkang yang ada sekarang memainkan peranan itu. Kami juga mempercayai mereka. Jadi ia memudahkan tugas saya."